



Inatsisartunut ilaasortaq  
Justus Hansen, Demokraatit

## **Kigutilerisumut piffissamik inniminniisarneq pillugu § 37 naapertorlugu 2017-141-mut akissut**

23-05-2017  
Suliaq nr.2017-10421  
Akt nr. 5438347

Aallarniutigalugu kigutilerisumut piffissamik inniminniisarneq pillugu apeqqutinnut Inatsisartut suleriaasianni § 37 naapertorlugu nassiussannut qujanaq.

Postboks 1160  
Tlf: 34 50 00  
Fax: 34 55 05  
3900 Nuuk

Email: [pn@nanog.gl](mailto:pn@nanog.gl)  
[www.naalakkersuisut.gl](http://www.naalakkersuisut.gl)

### **1. Nuna pissutaava qarasaasiakkut kingutilerisumut piffissamik suli inniminniisoqarsinnaannginneranut - oqarasuaatikkut aamma inniminniisarsinnaaneq periarfissaatut ilaatillugu - aamma Naalakkersuisut suliniutigerusunnerlugu tamatuma allanngortinnissaa?**

#### ***Oqarasuaatikkut inniminniisarneq***

Piffissaq peqqinnissaqarfimmilu sulisut napparsimasunut sapinngisamik amerlanerpaanut pitsaanerpaamik atorluarsinnaajumallugit oqarasuaatikkut inniminniisarneq atornagu ornigulluni misissortittarneq nunap immikkoortuini peqqissaaveqarfiit amerlasuut atorpaat. Taamaaliornermikkut napparsimasunik amerlanernik tigusinissaminnut piffissallu sapinngisamik atorluarnissaanut periarfissaqartarput, tamatumalu peqatigisaanik takkutinngitsoortartut ikittuinnaasarlutik.

Aammattaaq nunap immikkoortuini peqqissaaveqarfinni arlalinni kigutilerisumut piffissamik inniminniisarneq atorneqarsinnaavoq. Tamanna pingaartinneqarpoq innuttaasut ingerlaavartumik misissortinnissamut periarfissikkumallugit, taamaaliornikkullu kigutit piffissami sivilisunerusumik peqqissuutikkumallugit.

Meeqqat inuusuttuaqqallu misissortinnissamut suliaritinnissamullu ingerlaavartumik neqeroorfigineqartarput, taakkulu suli salliutillugit pingaartinneqarlutik.

#### ***Qarasaasiakkut inniminniisinnaaneq***

Qarasaasiakkut inniminniisinnaaneq ullumikkut periarfissaanngilaq aammalu suliniutip taamaattup aallartinneqarnissaani pissutsit arlallit sukumiisumik misissorneqaaqqaartariaqarlutik.

Qarasaasiakkut inniminniisarfimmik pilersitsinissaq Peqqinnissaqarfimmi salliutinneqarsimangilaq. Peqqissutsimut tunngasuni ukiuni kingullerni annertuumik aallunneqartut tassaapput napparsimasut elektroniskimik allattorsimaffiannik, COSMIC, atuutsitsilernissaq aammalu kigutilerineq immikkut eqqarsaatigalugu digitalimik qinnguartaasalernissaq.

Qarasaasiakkut inniminniisalernissaq sulissutigineqassappat aalajangersimasumik suliniuteqarnissami matuma kinguliani allassimasut misissueqqaarnikkut qulaajarneqqaartaariaqassapput:

- Napparsimasumut piffissaq pisariaqartinneqartoq atorneqartussa qanoq qulakkeerneqassava? Katsorsarneqarnissamut minutsit 30-t imaluunniit akunneq ataaseq immikkoortinneqassanersut napparsimasup nammineq nalilersinnaassagaa naatsorsuutigineqarsinnaanngitsoq nalilerneqarpoq.
- Piffissamik inniminniinerup aqunneqarnissaa. Qarasaasiakkut inniminniisoqartillugu ullorsiutinut nalunaarsorneqartut nutarterneqartarnissaat il.il. allaffissornikkut sulisumit qulakkeerneqartarnissaat suli pisariaqassaaq.
- Napparsimasut isumannaatsumik passunneqarnissaat inuillu pillugit paasissutissanut inatsisip eqqumaffigineqarnissaa qulaajarneqassapput. Danmarkimi kigutit nakorsaannut qarasaasiakkut piffissamik inniminniisarnermi NemID atorneqartarpoq.

Aamma oqaatigineqassaaq qarasaasiakkut inniminniisarnermik neqeroorteqartoqassappat innuttaasut internetimik atuisinnaasut pitsaanerusumik sullinneqarnissamik neqeroorfigineqassammata, tamannalu kikkut tamarmik peqqissutsikkut sullinneqarnissamut pisinnaatitaanissaannut akerliussalluni. Aammattaaq utoqqaat amerlasuut internetikkut attaveqarsinnaanngillat, taamaalillutillu innuttaasunut allanut sanilliullutik utoqqaat ajornerusumik inissisimalersinnaallutik. Tamatuma saniatigut kigutilerinermut atatillugu qarasaasiakkut inniminniisinnaaneq peqqinnissaqarfiup sinneranut atatillugu assinganik piumasaqarfiulernissaanik nassataqarsinnaavoq, tamannalu maannangaaq pisinnaassanngitsoq nalilerneqarluni.

Ilanngullugu oqaatigineqassaaq periutsimik nutaamik atuilertoqassappat tamanna nukissanik aningaasanillu annertoorujussuarmik atuiiffiusariaqassamat. Ullumikkullu nukissat sulisussallu pisariaqartinneqartut pigineqanngillat.

Siuliani allassimasut tunngavigalugu kigutilerinermut tunngatillugu piffissamik inniminniisarnermup allanngortinneqarnissaanut piffissaanngitsoq aammalu aningaasat sulisussallu pigineqanngitsut nalilerneqarpoq.

***2. Qarasaasiakkut inniminniisalernissamut periarfissiinissaq qanoq akeqassava - oqarasuaatikkut aamma inniminniisarsinnaaneq periarfissaatut ilaatillugu - kingutilerisimut piffissamik taamatut inniminniisarnissaq periarfissiissutigineqassappat?***

Qarasaasiakkut inniminniisalernissamut periarfissiisoqassappat tamanna napparsimasut elektroniskimik allattorsimaffiannik COSMIC-imut atatillugu pilersinneqartariaqartoq isumaqartoqarpoq. Nammineq iserfissaq ilaatigut piffissamik inniminniinerup atorneqarsinnaasoq COSMIC-imi ineriartortinneqarpoq, tamatumunngali atatillugu qanoq akeqassanersoq aamma nunatsinni peqqinnisaqarfimmi atorneqarsinnaassanersoq paasissutissiissutigineqarsinnaanani.

Inussiarnersumik inuulluaqqusillunga  
Med venlig hilsen

Agathe Fontain